

# Capítulo Primeiro

## Denominación, Fins, Domicilio e Ámbito

**Artigo 1º.-** A Federación Provincial da Coruña de Asociacións de Pais de Alumnos (APA) de Centros Públicos, en adiante nestes estatutos denominarase Federación Provincial, estará formada por asociacións de pais e nais de alumnos procedentes exclusivamente de centros públicos (en diante denominadas APAs ou asociacións nestes estatutos). Poderán ingresar na Federación Provincial as APAs de distinta procedencia, sempre que acepten os principios desta Federación Provincial, sinalados no capítulo segundo dos presentes estatutos.

**Art. 2º.-** As APAs federadas que así o decidan poderán constituírse en federacións comarcais e en federacións municipais, no seo da Federación Provincial, para cumplir mellor no seu ámbito os obxectivos previstos no artigo 6º dos presentes estatutos. A acción federativa respectará a autonomía de cada asociación afiliada, sen se inmiscir nos asuntos internos destas. Os presidentes das federacións comarcais e das federacións municipais, constituídas ó abeiro destes estatutos, serán vicepresidentes da Federación Provincial.

**Art. 3º.-** A Federación Provincial está baseada no principio de igualdade de tódalas APAs que a integran.

**Art. 4º.-** A inclusión ou a separación de cada APA coa Federación Provincial será libre e voluntaria.

**Art. 5º.-** A Federación Provincial constitúese por tempo indefinido, ó abeiro de canto determina a Constitución española de 1978, a Lei de asociacións 191/64 e a Lei 1/2002, de 22 de marzo, reguladora do dereito de asociación.

**Art. 6º.-** A Federación Provincial, como entidade sen ánimo de lucro, ten como obxectivos:

a) Realizar actividades sen ánimo de lucro, de asistencia social, relacionadas coa protección da infancia e da xuventude, que consisten en cursos educativos, talleres, excursións, campamentos, actividades deportivas, culturais e de protección á infancia, á natureza e ó medio natural; ben prestados directamente ou por medio das APAs federadas a través de convenios, concursos, acordos, etc. coas administracións públicas, en centros escolares ou fóra deles.

b) Conseguir un ensino de alta calidad, gratuíta e que desenvolva a personalidade humana, respectando os principios democráticos de convivencia e os dereitos e as



liberdades, ó abeiro de canto determina a Constitución española de 1978.

- c) Coordina-la actuación das APAs nela integradas, co fin de acadar mellor os seus obxectivos.
- d) Representa-las APAs federadas ante a Administración Autónoma de Galicia e ante a Administración Xeral do Estado.
- e) Fomenta-la creación e o desenvolvemento das APAs, promovendo e desenvolvendo cantas actividades sexan necesarias, así como facilitarlles información e asesoramento ás APAs.
- f) Promove-la participación dos pais e dos titores do alumnado a través das APA nos órganos de goberno dos centros públicos e nos órganos de participación da administración educativa, que determine a lexislación vixente.
- g) Potencia-la cultura e a lingua en Galicia.
- h) Establecer relacíons coas federacíons de APAs da Comunidade Autónoma de Galicia, doutras comunidades autónomas e coa Confederación Española de APAs (CEAPA). Así mesmo, participar na Confederación Galega de APAs de Centros Públicos (Confapa-GALICIA).
- i) Impulsa-la formación de pais e de titores de alumnos e o diálogo pais-profesores.

**Art. 7º.-** O domicilio da Federación Provincial fíxase na rúa Orzán, núm. 21, 15003 A Coruña. Este domicilio poderá ser variado por un acordo da xunta directiva.

**Art. 8º.-** O ámbito da Federación Provincial corresponde ós límites territoriais da provincia da Coruña.

## Capítulo Segundo

### Configuración, Admisión e Expulsión das Asociacións Membros

**Art.9º.-** Poderán ser membros da Federación Provincial tódalas APAs de ensino público, legalmente constituídas na Coruña, e que así o soliciten.

**Art.10º.-** Para integrarse na Federación Provincial presentarán unha solicitude, por escrito, xunto coa que achegarán os seguintes documentos:

- a) Certificado ou copia da acta da asemblea xeral, favorable á solicitude de ingresar na Federación Provincial.
- b) Copia dos estatutos da APA, co número de rexistro provincial de asociacións.
- c) Relación nominal dos componentes da súa xunta directiva, na que expresarán os cargos que desempeñen na mesma xunta con cadanxeus domicilios, así como o domicilio social da APA.
- d) Número de componentes da APA.
- e) Localidade e comarca á que pertence.
- f) No prazo de trinta días naturais, a xunta directiva da Federación Provincial acordará a admisión da APA solicitante; se o acordo foise negativo, faranse constar por escrito os motivos que o fundamentaron; neste caso a APA solicitante poderá recorrer contra esta decisión ante a primeira asemblea xeral que se realice. Esta resolución deberá ser motivada e inapelable, de non ser polo que dispoña a lexislación vixente. Na dita asemblea a APA solicitante poderá ser oída.

**Art. 11º.-** Perderá a condición de membro da Federación Provincial nos seguintes supostos:

- a) Por vontade propia, mediante acordo decidido na asemblea xeral, que lle será comunicado por escrito á Federación Provincial.
- b) Por incumprir-las obrigas económicas ou estes estatutos.
- c) A expulsión dunha APA só se poderá producir, logo de ser oída ante a asemblea xeral, por acordalo esta.

**Art. 12º.-** A APA, que por calquera causa deixe de pertencer á Federación Provincial, será responsable, na parte que lle corresponda, de cantas obrigas fosen contraídas pola Federación Provincial con anterioridade á súa separación ou á expulsión.



## Capítulo Terceiro

### Dereitos e Deberes das Asociacións e dos Membros

**Art. 13º.**- As APAs que se integren na Federación Provincial terán os seguintes dereitos:

- a) Participar nos órganos de goberno da Federación Provincial na forma prevista nestes estatutos.
- b) Recibir canta información sexa necesaria para coñecer as actividades da Federación Provincial.
- c) Incluír calquera asunto na orde do día dos órganos de goberno da Federación Provincial, na forma que estos estatutos establecen.
- d) A obteren o apoio da Federación Provincial para cumpri-los seus fins.
- e) A que se respecte a súa autonomía, sen interferi-la Federación Provincial, salvo que esta sexa requirida pola propia APA asociada.

**Art. 14º.**- Son deberes das APAs federadas:

- a) Non utiliza-la federación con fins políticos de carácter partidista.
- b) Cumpri-los estatutos e os acordos dos órganos de goberno da Federación Provincial.
- c) Contribuír ó sostemento económico da Federación Provincial na forma que estos estatutos determinen e que fixen os acordos da asemblea.
- d) Comunicarlle anualmente á xunta directiva da Federación Provincial a relación numérica dos seus asociados e a memoria que especifique as actividades desenvolvidas.
- e) Respecta-las competencias da Federación Provincial, polo que se absterá de formular comunicacións no seu nome.
- f) Comunicarlle á Federación Provincial calquera cambio dos seus estatutos, dos órganos de goberno e do domicilio social.

## Capítulo Cuarto

### Órganos de Goberno

**Art. 15º.-** Para cumpri-los seus fins a Federación Provincial rexerase polos seguintes órganos de goberno:

- Asemblea xeral
- Xunta directiva

#### SECCIÓN PRIMEIRA - ASEMBLEA XERAL

**Art. 16º.-** A asemblea é o máximo órgano de representación e de decisión da Federación Provincial; os acordos da mesma asemblea obrigan a tódolos seus membros. Estará constituída polos delegados designados polas APAs que a integran, que para estes efectos expedirán as credenciais correspondentes. O número de votos dos que dispoñerá cada APA equivalerá ó número de delegados.

O número de delegados con dereito a voto por cada APA será de dous.

Para adoptar acordos teranse en conta os delegados presentes.

**Art. 17º.-** A asemblea xeral poderá ser ordinaria ou extraordinaria. Esta será convocada polo presidente tralo acordo da xunta directiva.

Terá lugar unha asemblea ordinaria ó ano, no primeiro semestre do ano natural, na que se someterá á aprobación a memoria anual, o balance e as contas do exercicio anterior, ademais do orzamento para o ano seguinte e a análise da xestión da xunta directiva. Igualmente elixirase esta, na forma e no tempo que establecen os presentes estatutos, e debaterase o programa de actividades para o exercicio seguinte. Tódolos demais asuntos corresponderanlle á asemblea xeral extraordinaria.

**Art. 18º.-** Será convocada a asemblea extraordinaria por acordalo a xunta directiva ou por unha petición formulada, cando menos, por 1/3 das APAs federadas. Neste último caso formularase a petición, por escrito, coa orde do día que se propón.

**Art. 19º.-** As APAs membros que así o soliciten poderanlle formular, por escrito, ó presidente da Federación as peticionés para que sexan incluídas na asemblea extraordinaria; neste caso convocarase de acordo co procedemento establecido no artigo 17º. Se a xuízo do/a peticionario/a a súa solicitude fose desatendida, a xunta directiva estará obrigada a comunicarolle as razóns da súa denegación.

**Art. 20º.-** A convocatoria da asemblea xeral comunicárselles ás APAs membros mediante unha carta, cunha antelación mínima de 15 días. Nela deberá consta-lo lugar, o día e a hora da reunión, coa orde do día redactada de forma clara.

Fixaranse na convocatoria as horas da primeira e da segunda convocatoria, entre as cales deberá mediar, polo menos, un prazo de media hora.

**Art. 21º.-** A asemblea xeral quedará validamente constituída sempre que concorran, en primeira convocatoria, a maioría dos delegados e, na segunda convocatoria, calquera que sexa o número dos mesmos delegados presentes.

**Art. 22º.-** A Mesa da asemblea estará constituída pola xunta directiva da Federación Provincial, salvo no punto da orde do día que trate de elixi-la xunta directiva.

**Art. 23º.-** Os acordos da asemblea xeral serán adoptados co voto favorable da maioría dos delegados presentes.

Requirirse o voto favorable das dúas terceiras partes dos delegados nos asuntos seguintes:

- a) Para modifica-los estatutos.
- b) Para adquirir ou allear bens inmobles, ben sexa a título oneroso como a título gratuito.
- c) Para solicitar declaración de utilidade pública.
- d) Para integrar unha confederación de ámbito autonómico ou estatal.
- e) Para dissolve-la Federación Provincial.
- f) Nos demais supostos mencionados nestes estatutos.
- g) Para expulsar algunha APA que sexa membro.

**Art. 24º.-** As votacións serán efectuadas a man alzada polos delegados presentes, aínda que será secreta, sempre que o solicite a maioría dos delegados e, en todo caso, cando se elixa a xunta directiva.

**Art. 25º.-** Correspóndelle á asemblea xeral:

- a) Elexi-la xunta directiva.
- b) Aprobar e modifica-los estatutos.
- c) Determina-las cotas ordinarias e extraordinarias que han de satisfacer las asociacións membros.
- d) Aproba-la memoria anual.

- e) Aproba-los orzamentos ordinarios e extraordinarios elaborados pola xunta directiva.
- f) Adquirir e allear bens mobles, ben sexa por título oneroso ou gratuíto.
- g) Ratifica-los contratos de alugueiro subscritos pola xunta directiva.
- h) Autoriza-la concertación de créditos e de préstamos nunha contía superior a 18.000,00 euros.
- i) Decidir sobre as liñas xerais de actuación da Federación Provincial e sobre calquera asunto concreto que poida presentar.
- j) Aproba-las contas de ingresos e de gastos do balance anual.
- k) Aproba-la solicitude de declaración de utilidade pública.
- l) Aproba-la integración da Federación Provincial, nunha confederación de ámbito autonómico e estatal.
- m) Ordena-lo cesamento da xunta directiva ou dalgún dos seus membros.
- n) Expulsar asociacións membros.
- ñ) Disolve-la Federación Provincial.
- o) Nomear censores de contas.

## SECCIÓN SEGUNDA - XUNTA DIRECTIVA

**Art. 26º.-** A xunta directiva é o órgano executivo e de xestión da Federación Provincial. As súas funcións son:

- a) Decidi-las convocatorias de asemblea xeral e fixa-la orde do día.
- b) Desenvolve-la xestión ordinaria da Federación Provincial.
- c) Elaborar e presenta-los balances anuais, o estado de contas, os orzamentos, a memoria de xestión e o proxecto de actividades da Federación Provincial.
- d) Promove-las asociacións de pais, estender e desenvolve-la Federación Provincial.
- e) Informar e asesora-las APAs membros.
- f) Cumpri-los acordos da asemblea xeral.
- g) Contratar préstamos e/ou créditos nunha contía non superior a 18 000,00 euros, se a situación da Federación Provincial así o aconsella.

- h) Contratar e despedi-lo persoal da Federación, do que determinará as retribucións, o horario de traballo e as demais condicións contractuais.
- i) Cantas outras funcións non lle estean encargadas expresamente á asemblea xeral ou esta lle encomende.

**Art. 27º.-**

- a) A xunta directiva da Federación Provincial estará integrada polo presidente, o vicepresidente, o secretario, o tesoureiro e sete vocais, que serán elixidos entre os pais e as nais de alumnos ou titores que pertenzan ás APAs asociadas, na asemblea convocada para o efecto.

As candidaturas deberán ser completas, as cales poderán incluír suplentes para o caso de se produciren vacantes. A votación será secreta e cada delegado deberá votar por unha das candidaturas presentadas, sen emendalas ou modificalas ou deberá abstenerse.

Mediante o sistema de representación proporcional atribuiráselle a cada unha das listaxes, que fose alcanzado un mínimo do 10% dos votos emitidos, o número de postos na xunta directiva, que será proporcional ó número de votos obtidos. Dentro de cada listaxe resultarán elixidos os candidatos na orde que figuren en cada listado. O presidente será o que encabeza a listaxe más votada, o resto dos cargos será nomeados na xunta directiva.

- b) Ademais dos citados membros, formarán parte da xunta directiva, como vicepresidentes, os presidentes respectivos das Federacións Comarcais e das Federacións Municipais, que se constituísen ó abeiro do previsto no artigo 2º destes estatutos.

A orde das vicepresidencias será determinada pola xunta directiva por proposta do presidente da Federación Provincial.

**Art. 28º.-** A duración do mandado da xunta directiva será de dous anos. Na elección da xunta directiva constituirase unha mesa electoral, composta por tres membros, elixidos de entre os delegados presentes, que non pertenzan á xunta directiva saínte, que organizarán o proceso electoral.

O prazo para presenta-las candidaturas terá como límite, en todo caso, quince días antes de realiza-la asemblea, na sede social do Orzán, 21 - A Coruña.  
Unha vez proclamada, a nova xunta directiva ocupará a presidencia da Mesa da

asamblea, coa que se dará por finalizada así a intervención da mesa electoral.

No caso de non se presentaren candidaturas e, polo tanto, ó non ser posible elixir xunta directiva, a asemblea xeral, baixo a presidencia da mesa electoral, deberá elixir entre os seus membros cinco delegados que se constituirán en comisión xestora, co único obxectivo de convocar novas eleccións nun prazo que non supere os tres meses.

Os membros da xunta directiva serán cesados polos seguintes motivos:

- a) Incorrer nalgúnha das incompatibilidades previstas no artigo 29º dos presentes estatutos.
- b) Por perderen a condición de pai, nai ou tutor do/a alumno/a membro dunha APA afiliada.
- c) Por non asistir, sen xustificación fidedigna, a tres reunións consecutivas da xunta directiva ou a cinco non-consecutivas no período dun ano natural.

No caso de se producir vacante por calquera causa na xunta directiva, aquela será cuberta automaticamente polo/a candidato/a seguinte da listaxe á que pertence o/a substituído/a.

**Art. 29º.-** Será incompatible pertencer á xunta directiva e exercer actividades públicas ou privadas que poidan xerar conflito de intereses coa Federación Provincial a xuízo da asemblea xeral.

Así mesmo, os cargos da xunta directiva, no caso de seren candidatos a eleccións xerais ou a autonómicas, non poderán representa-la Federación Provincial durante ese período e, no caso de saírem electos, deberán renunciar ó cargo.

Tamén serán incompatibles, con pertencer á xunta directiva da Federación Provincial, os cargos políticos da Administración educativa de calquera ámbito.

**Art. 30º.-** A xunta directiva reunirase unha vez ó mes no período do curso escolar, mediante convocatoria do presidente. A convocatoria comunicárselles ós directivos de forma indubidable.

A xunta directiva declararase validamente constituída cando na primeira convocatoria concorran a maioría absoluta dos seus membros e, no prazo de media hora, calquera que sexa o número de asistentes.

Con carácter extraordinario, a xunta directiva reunirse cando o decida o presidente ou o solicite un tercio dos membros do órgano. O presidente convocará neste caso a reunión coa orde do día proposta polos directivos peticionarios, nun prazo máximo de dez días.

De cada reunión da xunta directiva redactarase unha acta, que será gardada no arquivo previsto para tal efecto.

**Art. 31º.-** Os acordos serán tomados por maioria simple de votos. No caso de empataren, decide o voto do presidente. O acordo de convocatoria da asemblea xeral requirirá a presenza de, polo menos, a metade dos membros da xunta directiva.

**Art. 32º.-** O presidente ten a representación legal e a pública da Federación Provincial e poderá subscribir documentos públicos e privados.

Asumirá as seguintes facultades:

- a) Convoca-las reunións dos órganos de goberno e presidilas.
- b) Cumpri-los acordos dos órganos de goberno.
- c) Desenvolve-la xestión dos asuntos ordinarios.
- d) Abrir e cancela-las contas nas entidades bancarias e de aforro, xunto co tesoureiro, no nome da Federación Provincial. Solicitar préstamos coas limitacións e as disposicións sinaladas no art. 26º g) e, se fosen necesarios, para o desenvolvemento económico da Federación.
- e) Estender e asina-los libramientos de pago necesarios, así como os talóns, os cheques, etc., convxuntamente co tesoureiro da Federación.
- f) Recibir subvencións ou axudas económicas no nome da Federación, de calquera administración pública, de entidades privadas, así como calquera outro ingreso que sexa conforme á lei.
- g) Recibi-las cotas que se establezan para as APAs na asemblea xeral.
- h) E tódalas competencias que a legislación vixente estableza.

**Art. 33º.-** Correspónelle ó vicepresidente a substitución do presidente, por ausencia ou por delegación deste.

Os vicepresidentes que lles corresponden ás federacións comarcas ou ás

federacións municipais coordinarán a actividade da Federación Provincial no ámbito ó que pertencen e representan.

**Art. 34º.-** Correspóndelle ó secretario:

- a) Elaborar e custodia-las actas das reunións.
- b) Conservar e tramita-la documentación administrativa da Federación Provincial.
- c) Coordina-lo funcionamento da xunta directiva e das comisións que se poidan crear para tal efecto.
- d) Exerce-la xefatura inmediata do persoal contratado pola Federación Provincial.
- e) Custodia-los bens da Federación Provincial.

**Art. 35º.-** Correspóndelle ó tesoureiro:

- a) Recada-las cotas da Federación Provincial, custodialas e investilas, segundo os acordos dos órganos de goberno.
- b) Asina-los pagamentos convxuntamente co presidente e facelos efectivos.
- c) Elabora-lo balance e os orzamentos.
- d) Visa-los cobramientos convxuntamente co presidente
- e) Cantas outras actividades relacionadas cos recursos económicos da Federación Provincial lle encargue a xunta directiva.

**Art. 36º.-** Correspóndelles ós vocais:

- a) Coordinar áreas que lles poidan ser encomendadas pola xunta directiva.
- b) Manter informada a xunta directiva e a asemblea xeral dos aspectos específicos que lles poidan ser encargados.

**Art. 37º.-** A xunta directiva da Federación Provincial poderase servir de asesores ou de gabinetes de apoio, que presten axuda ou asesoramento nos asuntos que se considere conveniente. Non terán voto nas reunións os órganos de goberno.



## Capítulo Quinto

### Dos Recursos Económicos

**Art. 38º.-** A Federación Provincial créase sen patrimonio fundacional. Os recursos económicos procederán de:

- a) As cotas ordinarias e extraordinarias que deberán paga-las asociacións membros, fixadas pola asemblea xeral.
- b) As doazóns, subvencións ou transmisións por título oneroso ou gratuito, de calquera índole, que sexan aceptadas por parte dos órganos competentes.
- c) Os rendementos que poida produci-lo patrimonio propio.
- d) Calquera outro autorizado pola lei.

**Art. 39º.-** O orzamento anual ordinario da Federación Provincial non excederá de 400 000,00 euros. O exercicio económico coincidirá co ano natural.

A xunta directiva daralle conta dos resultados económicos á asemblea xeral, na forma establecida nos presentes estatutos.

**Art. 40º.-** A asemblea xeral elixirá os censores de contas de entre os delegados presentes que, en ningún caso, serán compoñentes da xunta directiva da Federación Provincial. Reuniranse polo menos 30 días antes de efectua-la asemblea xeral ordinaria e aprobarán, co seu visto e prace, os balances e o estado de contas que presente a xuntá directiva; no caso contrario, expoñerán os puntos de vista relacionados coa súa competencia.

Para desenvolve-las súas funcións solicitaránlle á xunta directiva canta información precisen, co que esta estará obrigada a facilitala.

O estado de contas da Federación Provincial seralles enviado, co informe dos censores de contas, ás APAs membros, antes de que teña lugar a asemblea xeral ordinaria.



## Capítulo Sexto

### Da disolución da Federación Provincial

**Art. 41º.-** A Federación Provincial constitúese por tempo indefinido, e esta disolversese polas seguintes causas:

- 1) Por acordalo a asemblea xeral extraordinaria, co voto favorable das dúas terceiras partes dos delegados presentes.
- 2) Nos demais casos previstos pola lei.

**Art. 42º.-** No caso de disolución da Federación Provincial, destinaranse os seus bens na forma prevista no artigo 39º do Código civil, salvo que a asemblea xeral extraordinaria que acorde a disolución resolva determinar outros beneficiarios que se deberán dedicar a cumplir fins análogos ós da Federación Provincial.

Todo canto non estea previsto nos presentes estatutos aplicáráselle a vixente Lei orgánica 1/2002, de 22 de marzo, reguladora do dereito de asociación e as disposicións complementarias.

Don Julio Abalde Alonso, con DNI: 36013481, secretario da Federación Provincial á que se refiren estos estatutos,

CERTIFICA que os presentes estatutos foron modificados, para seren adaptados ás previsións da Lei orgánica 1/2002, de 22 de marzo, por acordalo a asemblea extraordinaria de socios de data 31 de maio de 2003.

A Coruña, 30 de setembro de 2003

V. e pr.  
A presidenta

Asdo.:

O secretario

Asdo.:



XUNTA DE GALICIA  
CONSELLERÍA DE XUSTIZA,  
INTERIOR E ADMINISTRACIÓN LOCAL  
Delegación Provincial

Fernando Macías, 18 - 1º  
15071 A CORUÑA  
Tel. 981 18 59 24 - Fax 981 18 57 61

XUNTA DE GALICIA
CONS. DE XUSTIZA INTERIOR E ADMINISTRACIÓN LOCAL
DELEGACIÓN PROVINCIAL A CORUÑA
02 XII. 2004
Registro de SAIDA
Nº 52

SR. PRESIDENTE DA FEDERACIÓN  
PROVINCIAL DE LA CORUÑA DE  
ASOCIACIONES DE PADRES DE  
ALUMNOS DE CENTROS PÚBLICOS  
ORZÁN N° 21  
15003 A CORUÑA

Código : 110124 SECC. ESPECTACULOS PUBLICOS E ASOCIACIONES  
Asunto : Comunicación inscripción modificación adaptación N° 3/2<sup>a</sup>

Comunícolle a resolución dictada no día de hoxe polo Delegado Provincial da Consellería de Xustiza, Interior e Administración Local:

Examinado expediente sobre modificación dos Estatutos da Entidade denominada **FEDERACION PROVINCIAL DE LA CORUÑA DE ASOCIACIONES DE PADRES DE ALUMNOS DE CENTROS PÚBLICOS** inscrita por Resolución do 7 de abril de 1981, correspondéndolle o nº 1981/000003-2 (AC) do Rexistro Provincial de Asociaciós e tendo en conta os seguintes

#### FEITOS

Que a Asemblea Xeral Extraordinaria da Entidade, celebrada o día 31 de maio de 2003, acordou a modificación dos seus Estatutos para adapta-los á Lei orgánica 1/2002, e afecta unha das modificacións realizadas ó seguinte extremo rexistral:

FINS: regulados no artigo 6.

#### FUNDAMENTOS DE DEREITO

Primeiro: Que esta Delegación Provincial é competente para resolver sobre a inscripción solicitada, de conformidade coa Lei orgánica 1/2002, do 22 de marzo, reguladora do Dereito de Asociación en relación co Real Decreto 1639/1996, do 5 de xullo, sobre traspaso de funcións e servicios á Comunidade Autónoma de Galicia en materia de Asociaciós e Orde do 26 de setembro de 1996.

Segundo: Que na adopción do acordo de modificación cumpriuse o disposto nos Estatutos Sociais, que o mesmo non altera a natureza xurídica da Entidade e que na documentación presentada non se aprecia que concorran os supostos contemplados nos números 2 e 5 do artigo 22 da Constitución.

Terceiro: Vistos os preceptos legais citados e a Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común.

#### RESOLVO

Inscribi-la modificación e adaptación dos Estatutos da Entidade da que se trata e visa-los novos, ós sós efectos de publicidade previstos no artigo 22 da Constitución.

Contra a presente resolución poderá interpoñerse recurso de alzada ante o Excmo. Sr. Conselleiro de Xustiza, Interior e Administración Local no prazo de un mes contado a partir do día seguinte ó da notificación desta resolución; ou calquer outro recurso que estime pertinente o seu dereito.

Remítenselle un exemplar dos estatutos selados por este centro.

A Coruña, 30 de decembro de 2003

A SECRETARIA PROVINCIAL

Asdó. Ana Lado Firiz